

Najukkani nerisassiarineqartut akiisa appartinneqarnissaannut, taamaalillunilu nunatsinni tunisassiarineqartut piumaneqarnerulernissaannut, naalakkersuinikkut sakkusaa sinnaasut pillugit nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat kingusinnerpaamik UKA2026-p aallartinnginnerani Saqqummiunneqarsimassaaq
(Inatsisartunut ilaasortaq Mariane Paviassen Jensen, Inuit Ataqatigiit)

Akissuteqaat

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Aappassaaneerneqarnera

Naalakkersuisut sinnerlugit Aalisarnermut, Piniarnermut Nunalerinermullu Ataatsimiititaliaq siunnersuutip aappassaaneerneqarnissaanut isumaliutissiissutaanut qutsavigaakka. Naalakkersuisut maluginiarpaat ataatsimiititaliami amerlanerussuteqartut siunnersuutip allanngortinneqarnissaanut Naalakkersuisut siunnersuutaat akuersissutigineqarnissaat inassutigimmassuk.

Naalakkersuisulli malugeqquniassavaat 7,3 mio. kr.-inik isumaliutissiissummi Kalaallit Nunaanni imminut pilersornerup ineriartortinneqarnissaanut tunngasumut allannertalik aammalu Mariane Paviassen Jensenip aalajangiiffissatut siunnersuutaani allannertalik, maanna atuukkunnaarnikummat.

Naalakkersuisut siunnersuutip siullermeerneqarneranut akissutaanni paasissutissiippat 2026-mi Kalaallit Nunaanni imminut pilersornerup ineriartortinneqarnissaanut 2,161 mio. kr.-t immikkoortinneqartussatut pilersaarutaasoq, taakkuli 2026-mut Aningaasanut Inatsisissatut Siunnersuummi kontomi 51.07.08-miittumi takuneqarsinnaallutik.

7,3 mio. kr.-nit taagorneqartut § 37 akissummi normu 49-mi imminut pilersornermut tunngassutilimmut junip aappaani tunniunneqartumi tunngaveqarpoq. Ilisimatitsissutigissavara § 37-mi akissut kingorna suliaasaqarfinnik allannguisoqarnikummat. Neqimut KNI-mullu kiffartuussinermik isumaqatiissutissanut tunngasut Aningaasaqarnermut Akileraartarnermullu Naalakkersuisoqarfinnut suliaasaqarfinnik allannguinermi isumaqatigiissut julip aallaqqaataani atuutilernerata kingorna nuunneqarnikummata. Taamaammat suliaasat taassunga tunngasunut aningaasat aamma nuunneqarlutik.

Taamatut oqaaseqarlutik Naalakkersuisut siunnersuut akuersissutigineqassasoq inassutigaat.